



# EUSKARA AZTERKETA EREDUA

## EAEko HEOak

### TARTEKO MAILA (B1)

#### 1. DOKUMENTUA: ATAZAK

EAEKO HEOak-HEOOnCAPV

## IRAKURRIAREN ULERMENA (20 puntu)

### 1. ARIKETA (6 puntu)

- *45 urte lanean eman ondoren, eta horietako 32 Aian, erretiroa hartu du Javi Vilches erizain kataluniarrak. Hemen duzu egin zioten elkarrizketaren pasarte bat.*
- **Galderak eta erantzunak lotu behar dituzu, baina kontuan izan galderak ezin direla errepikatu eta 3 sobera daudela.**
- *0 erantzuna adibidea da.*

### JAVI VILCHES, AGUR PRAKTIKANTEARI

#### GALDERAK:

- Aiara etorri zinenean, alde handirik nabaritu zenuen herriaren eta hiriaren artean?
- Egin duzun lanaren alde on eta txarren bat aipatzekotan, zein?
- Hainbat medikurekin lan egin duzu, zer moduz moldatu zara haiekin?
- Hizkuntza aldetik, problemarik izan zenuen?**
- Noiz erabaki zenuen erizaina izatea?
- Nolako jendea aurkitu zenuen Aiara etorri zinenean?
- Zein izan da erretiroa aurreratzearen arrazoia?
- Zer aholkatuko zenioke herriko hurrengo erizainari?
- Zer dela eta utzi zenuen Katalunia hona etortzeko?
- Zer sentitu zenuen erretiroko aurreneko goizean?

## ERANTZUNAK:

0.

***la salbuespenik gabe inguruko guztiek egiten zuten euskaraz, eta edadeko eta ume dezente ez zekiten besterik egiten. Hori ikusita, garbi neukan euskara ikasi behar nuela, eta azkar. Ez zitzaidan zuzena iruditzen ez ikastea, behar-beharrezkoa zen jendea ulertzeko eta ni neu integratzeko.***

1.

Banketxe batean hasi nintzen lanean 15 urte nituela, baina 21 urterekin, soldaduska egiten ari nintzela, ikasten hasi nintzen: oinarriko ikasketen azken mailak eta, gero, karrera egiteko ikastaroa. Garai hartan konturatuta nengoen harreman hurbilagoa nahi nuela jendearekin eta lanbide hori egokia zela niretzat.

2.

Ikasten ari nintzela bisitan etorri nintzen eta, Kontxako badiarekin liluratuta, zin egin nuen hemen biziko nintzela. Eta hala izan zen. 24 urterekin lana eskaini zidaten Donostiako Ospitalean, erizainak behar baitzituzten garai hartan. Bi urte eman nituen bertan eta gero Aian aurkitu nuen postua eta etxea.

3.

Asko inpresionatu ninduen hemengoan umiltasunak eta zer pozik bizi ziren gauza gutxirekin (batzuek, adibidez, ez zuten ezta ur berorik ere). Bizimodu xumea zuten eta, hala ere, zutena emateko prest zeuden beti. Errespetu handiz tratatzen gintuzten medikua eta biok eta, hasieratik, oso garbi neukan nik ere haiei zor niela errespetua.

4.

Hasieran, akaso, askatasuna kentzen zidan ordutegiak, eta urduri jartzen nintzen senideekin edo lagunekin elkartzeko nintzenez, abisu bat etorriko zen beldur. Baina eman, gauza asko. Kanpotik etorritako herritartzat onartu naute, euskara ikasi izana eskertu didate, oso zuzenak izan dira nirekin.

5.

Zenbait gauza egin nahi ditudalako, osasunak uzten didan bitartean; esaterako, Done Jakue Bidea oinez egin, bide berdeak bizikletaz, Parisen denboralditxo bat pasatu frantsesa lantzen... Gazte-gazte nintzela hasi nintzen lanean eta denbora falta sentitu dut ni neu garatzeko.

6.

Lasaitasun handia eta zorretan nagoela herri honekin. Jendearekin izan dudana tratua ikaragarri ona izan da eta asko hunkitu naute agur esateko moduek, baina herriak emandakoa ez dut galduko, barruan daramat eta.

*Karkara aldizkaria, 2011-03-04, 294. zk. (laburtua eta moldatua)*

Erantzunak	0	1	2	3	4	5	6
Galderak	D						

## 2. ARIKETA (7 puntu)

- *Osa ezazu ondoko testua falta diren esaldiak jarriz (A-K).*
- *Esaldiak ezin dira errepikatu eta 3 sobera daude.*
- *0 hutsunea adibidea da.*

### AUTOA TRUKATUZ, AURREZTU

*Autoa gutxiago erabiltzeko, Ukanauto zerbitzua jarri dute martxan Uribe Kostan.*

“Hemendik aurrera, autoa hartu aurretik, \_\_\_\_\_(0)\_\_\_\_\_ garraiobide hori erabiltzea beharrezkoa ote den ala ez”, Antxon Goikoetxearen hitzetan. Joan den astean jarri zuten martxan Bizkaiko inguru horretan Ukanauto zerbitzua, *car sharing* sisteman oinarrituta. Horren arabera, zerbitzuan izena eman duten pertsona guztiek eskuragarri dauden autoetako bat hartzeko eskubidea izango dute behar duten guztietan, \_\_\_\_\_(1)\_\_\_\_\_.

Etxebizitza batean bigarren ibilgailu bat egoten denean, auto horrek askotan badaezpadako funtzioa betetzen duela dio Goikoetxeak, eta Ukanauto zerbitzu hori betetzera dator. Era horretan, gainera, Uribe Kostako Mankomunitateak eskainitako datuek azaltzen dutenez, \_\_\_\_\_(2)\_\_\_\_\_, erabiltzaileak zergarik, errebisiorik eta aseguruak ordaindu beharrik ez daukalako. Autoa erreserbatzeko garaian, gainera, zenbat ordaindu beharko duen jakin ahal izango du erabiltzen duenak, \_\_\_\_\_(3)\_\_\_\_\_ aldeztatik. Kilometro bakoitzeko 0,22 euroko kuota dute autoek, eta 3 eurokoa erabilera bakoitzeko. Bidaia are merkeago egiteko, \_\_\_\_\_(4)\_\_\_\_\_, eta sistema honek horretarako aukera ematen du.

*Car sharing* sistemaren antzekoak izan dira aurretik Euskal Herrian, Ataungo *Sarecar* kotxe elektrikoaren alokairua, esaterako. Baina, Goikoetxeak azpimarratu duenez, *Ukanauto* osotasunez diru publikoaren bidez ordaindutako era horretako lehen enpresa da. *Sarecar* zerbitzuak, gainera, auto elektrikoaren alokairua eskaintzen du, *Ukanautok* ez bezala. “\_\_\_\_\_ (5)\_\_\_\_\_, eta arazoak izango genituzke auto elektrikoak eskainiko bagenu. Edozein modutan, ez dugu aukera hau etorkizunerako baztertzen”, dio.

Ukanautok zazpi auto dauzka gaur egun erreserbatzeko moduan, zazpi udalerrirentzat. Auto horietatik bost hibridoak dira, eta gainerako biak gasolinazkoak. Proiektua hasi besterik ez da egin oraindik, baina etorkizunean \_\_\_\_\_(6)\_\_\_\_\_, eta zerbitzua udalerriri guztietara ere zabaltzea nahi dute.

Ukanautok aste bateko ibilbidea egin du, eta \_\_\_\_\_(7)\_\_\_\_\_, jarrera ona agertu du Goikoetxeak. “Dagoeneko hamabi bazkide lortu ditugu, era honetako esperientziak egin diren lekuetan lortu ez dena”.

Lander Muñagorri, *Berria* 2011-09-29 (laburtua eta moldatua)

- A. antzeko prezioan jarri dituzte aukeran
- B. auto gehiago eskaintzea aurreikusten dute
- C. autoen bateriak kargatzeko sarea oraindik eskasa da
- D. betiere ibilgailuak libre baldin badaude
- E. bezeroak zain daude autoren bat hartzeko
- F. dirua aurrezten da, urteko 2.500 euro inguru
- G. egingo duen bidaia zehaztu beharko baitu
- H. erabiltzaileak bi aldiz pentsatuko du**
- I. ezinezkoa da auto gehiago eskaintzea
- J. ibilgailua partekatu daiteke
- K. oraindik balorazioa egiteko goiz bada ere

0	1	2	3	4	5	6	7
H							

### 3. ARIKETA (7 puntu)

- Liburu elektronikoei buruzko testua duzu hemen.
- **Testua osatu behar duzu (1-7) a, b edo c aukeratuz.**
- 0 adibidea da.

#### PAPERIK GABEKO LIBURUAK

Apirilaren 23a, Liburuaren Eguna. Liburu dendara edo hainbat herri eta hiritan jartzen dituzten azoketara joan eta liburuak erosteko eguna. Paperekoa datorkigu burura, jakina, baina apurka-apurka *e-book* edo aldaera elektronikoak tokitxoak \_\_\_\_ (0) \_\_\_\_ nahi du.

Liburu arrunt baten tamainakoa da, pantaila du eta pantaila horretan irakurtzen dira Internet bidez jaitzitako liburuak. Edukiera da *e-book*aren ezaugarri nagusia, dokumentu asko \_\_\_\_ (1) \_\_\_\_\_. Aldeko eta kontrako iritziak sortzeko gaitasuna ere badu. Hala, liburu elektronikoaren kontra daudenek diote paperezko liburuaren eta irakurlearen artean gertuko harremana \_\_\_\_ (2) \_\_\_\_\_, eta pantailari begira egoteak begiei kalte egiten diela. Baina baieztapen hori ukatzen dutenek diote, liburu elektronikoaren kasuan, tinta elektronikoaren teknika erabiltzen dela, eta horri esker begiak \_\_\_\_ (3) \_\_\_\_\_.

Oraingoz, formatu honek ez du arrakasta handirik izan \_\_\_\_ (4) \_\_\_\_\_ artean. Elkar argitaletzeko Joseba Urkiolak azaldu duenez, batez ere bidaiariek, teknikoek eta teknologiazaleek jotzen dute liburu dendetara halakoak erostera. Alberdaniako Jorge Gimenezek gaineratu duenez, irakurlearen profila 35 eta 45 urte artekoa da. Gazteak erakartzeaz gain, itzulitako liburuak digitalizatzeko eskubideak lortzea da helburua.

#### Ez da atzo goizekoa

Liburu elektronikoa iritsi berria dela ematen du, baina \_\_\_\_ (5) \_\_\_\_\_ 40 urte jaio zen, Gutenberg proiektuaren bitartez. Michael Hart izan zen egitasmo horren bultzatzailea, doako liburu elektronikoaren liburutegi handia egitea baitzuen amets. Liburu batzuen kasuan, egileak berak utzi ditu eskubideak; \_\_\_\_ (6) \_\_\_\_\_, obrak ez du eskubiderik; eta gainerakoetan eskubideak eduki bai, baina hauek balioa galdu dute. Andoni Sagarna euskaltzainak Durangon egindako bileran bere iritzia eman zuen: "Aspaldi ari gara liburu digitalak egiten; egiten ez duguna, \_\_\_\_ (7) \_\_\_\_\_, liburu digitalak saltzea da. Azken finean, kate digital horren azken pausuan dago gakoa".

*R. Perez, Gaztezulo 106. zbk., 2010eko apirila, egokitua*

<p>0. a) berritu <b>b) lortu</b> c) utzi</p>	<p>1. a) gordetzeko ahalmena baitu b) gordetzen dituen arren c) gordetzen ikasten badu</p>	<p>2. a) erabat galdu dela b) ordaindu behar dela c) sortzen dela</p>
<p>3. a) ez direla nekatzen b) nekagarri izaten direla c) nekatzen direla</p>	<p>4. a) adineko pertsonen b) gazteen c) helduen</p>	<p>5. a) badira b) duela c) orduan</p>
<p>6. a) beste batzuetan b) bestela c) besterik</p>	<p>7. a) gainera b) izan ere c) ordea</p>	

0	1	2	3	4	5	6	7
b							

## ENTZUNAREN ULERMENA (20 puntu)

### 1. ARIKETA (6 puntu)

- Grabazioan Mikel Bringas entzungo duzu. Mikelek, emazteak eta bi seme-alabek hiru hilabete pasa zituzten Zelanda Berrian bizikletaz ibiltzen.
- Elkarrizketan bidaiari buruz hitz egiten du, baina bere **erantzunak bakarrik entzungo dituzu.**
- Mikelen **erantzun bakoitza (1-6) galdera egokiarekin lotu behar duzu (A-I).**
- Kontuan izan galderak ezin direla errepikatu eta bi sobera daudela.
- F adibidea da.

 [1.audioa-Zelanda berrian bizikletaz](#)

### ZELANDA BERRIAN BIZIKLETAZ

*Euskadi Irratia, Mezularia, 2011-09-28 (laburtua)*

#### GALDERAK:

- A. Aberatsa izan behar da horrelako bidaia bat egin ahal izateko?
- B. Bidaiak bi zati ditu, bidaia eta gero bloga, ezta?
- C. Bizikletaz zebilen jende asko topatu zenuten han?
- D. Mota honetako bidaia asko egin dituzue?
- E. Nolako harremana izan zenuten bertakoekin?
- F. Nori bururatu zitzaion Zelanda Berrira joatea?**
- G. Seguruenik zaila egingo zitzaizuen 2 eta 5 urteko seme-alabekin hain urrutira joatea, ezta?
- H. Zelanda Berria zoragarria omen da, zer dauka ba?
- I. Zelanda Berrira joan baino lehen, zenbat denbora eman zenuten bidaia prestatzen?

#### ERANTZUNAK:

Galderak:	F						
Erantzunak:	Adib.	1	2	3	4	5	6



## 2. ARIKETA (7 puntu)

- *Izaskun Kortazar, Idahon bizi den euskalduna, nazioarteko diasporako kongresuan parte hartzera etorri da. Kongresu honi buruz, bere buruari buruz eta NABO izeneko erakundeari buruz hitz egingo digu.*
- *Entzundakoaren arabera, **aukeratu erantzun zuzena (a, b edo c).***
- *0 galdera adibidea da.*



[2.audioa-Izaskun Kortazar](#)

### IZASKUN KORTAZAR

*Euskadi Irratia, 2011-11-05 (laburtua)*

#### 0. Zenbat denbora zeraman Izaskun Kortazarrek Euskal Herrira etorri gabe?

- a) ~~ia urtebete.~~
- b) urte erdia.
- c) urtebete baino gehiago.

#### 1. Diasporako kongresu internazionallean...

- a) 150 herrialdetako adituak elkartu dira.
- b) Euskal Etxeetako ordezkariak elkartu dira.
- c) herrialde askotako lagunak elkartu dira.

#### 2. Zein izan da Jardunaldien helburua?

- a) Euskal Etxeek dituzten arazoak konpontzen saiatzea.
- b) Euskal Etxeen egoeraren berri ematea.
- c) hurrengo lau urteetarako proiektua elkarrekin egitea.

#### 3. Zergatik joan zen Izaskun Kortazar Boisera?

- a) Boisen txikitako lagunak zituelako.
- b) Euskal Herrian lanik ez zuelako.
- c) han ikastola bazegoela jakiteak animatu zuelako.

#### 4. Zergatik egin zuen masterra?

- a) Boisera joan baino lehen prestakuntza hobetu nahi zuelako.
- b) ikastolan lanean jarraitu ahal izateko ezinbestekoa zela esan ziotelako.
- c) legezko egoeran bizi ahal izateko bertako titulazio bat lortu nahi zuelako.

#### 5. NABO-n koordinatzailea izateaz gain, non egiten du lan Izaskunek orain?

- a) Boiseko ikastolan.
- b) Boiseko museoan.
- c) Boiseko unibertsitatean.

**6. Nork osatzen du NABO erakundea?**

- a) 1973tik aurrera sortu diren Euskal Etxeek.
- b) Estatu Batuetako eta Kanadako Euskal Etxeek.
- c) Estatu Batuetako Euskal Etxeek bakarrik.

**7. Zein da NABO erakundearen helburua?**

- a) Euskal Etxe berrienei aholku ematea eta laguntzea.
- b) Euskal Etxeen artean diru-laguntzak banatzea.
- c) Euskal Etxeen arteko elkarlana bultzatzea.

0	1	2	3	4	5	6	7
a							

EAIEKO HE OAK-EE OOI CAPV

### 3. ARIKETA (7 puntu)

- Irratsaio baten pasartea entzungo duzu. Bertan Zuhaitz Gurrutxagak Mexikon gertatu zitzaion istorio bat kontatzen du.
- Zuhaitzek esaten duenaren arabera, **esan ondoko esaldiak EGIA (E) edo GEZURRA (G) diren (1-7).**
- 0 esaldia adibidea da.



[3.audioa-Zuhaitz Gurrutxaga](#)

### ZUHAITZ GURRUTXAGA

*Euskadi Irratia, 2011-08-18 (laburtua)*

		E	G
0	<b>“Aire” izeneko kantua Los Cafres taldearena da.</b>	X	
1	Zuhaitzek kontatzen duen istorioa Mexikora egindako azken bidaiari gertatu zitzaion.		
2	Espero zuen baino lehenago itzuli zen Euskal Herrira bakarrik sentitzen zelako.		
3	Neskaren etxean bi aste pasa zituen ezer ordaindu gabe.		
4	Mexikotik Kaliforniara bidaiatu zuen lagun batekin elkartzeko.		
5	Neskak hondartza batera eraman zuen eta han ezagutu zuen “Aire” izeneko kantua.		
6	Zuhaitzek ez zuen lortu neskari muxurik ematea.		
7	Zuhaitzek pena handia sentitu zuen neskari taxitik agur esatean.		

0	1	2	3	4	5	6	7
E							

## IDATZIZKO ADIERAZPENA (20 puntu)

### 1. ARIKETA: IDAZLAN LABURRA

#### OHARRA (60-80 hitz / 5 puntu)

Bizi zaren kalea eta bereziki ataria askotan zikin egoten dira (futbol partidak, jaiak,...). Zuri ez zaizu gustatzen. Idatzi ohar bat bizilagunei eta bertan adierazi:

- Nor zaren.
- Zein den arazoa eta zer egin daitekeen konpontzeko.
- Proposatu elkartzeko eguna, ordua eta lekua.

## 2. ARIKETA: IDAZLAN LUZEA

### MEZU ELEKTRONIKOA (160-180 hitz / 15 puntu)

Lagun batek e-mail hau bidali dizu:

Kaixo,

Lehengo egunean esan zenidan nekazal etxe batean pasatu zenituztela oporrak eta oso gustura. Guk bat alokatu nahiko genuke astebete pasatzeko. Esango didazu, mesedez, nolakoa zen zuen nekazal etxea eta zer moduz pasatu zenuten?

Besarkada bat,

Miren.

Erantzun lagunari beste e-mail batekin eta bertan:

- Etxea deskribatu (gela-kopurua, prezioa, egoera, ingurua).
- Kontatu zer gustatu zitzaizun gehien eta zergatik.
- Kontatu han gertatutako zerbait.
- Gomendatu lagunari etxe hori.

## AHOZKO ADIERAZPENA (20 puntu)

### 1.ARIKETA: BAKARRIZKETA (8 puntu)

- Hona hemen **AISIALDIARI** buruzko argazki bat eta zenbait galdera.
- Argazkia eta galderak kontuan edukita, hitz egin gaiari buruz eta eman zeure iritzia.

- Zer iruditzen zaizu gaur egungo telebista?
- Zer ikusten duzu normalean? Noiz?
- Askok aldatu da telebista azken urteotan?
- Gogoratzen duzu txikitako edo gaztetako gustuko saioen bat?
- Ahal izanez gero, zer aldatuko zenuke telebista hobea izateko?



## 2.ARIKETA: ELKARRIZKETA (12 puntu)

### Maiatzeko zubia

#### A IKASLEA

- ✓ Maiatzeko zubian elkarrekin joateko asmoa duzue.
- ✓ Bakoitzak bi leku proposatzea erabaki duzue. Horretarako kontuan hartuko duzue:
  - ostatua
  - eguraldia
  - garraiobidea
- ✓ Zuk ondorengo proposamenak egingo dizkiozu:



EDO



- ✓ Saiatu ados jartzen.

### Maiatzeko zubia

#### B IKASLEA

- ✓ Maiatzeko zubian elkarrekin joateko asmoa duzue.
- ✓ Bakoitzak bi leku proposatzea erabaki duzue. Horretarako kontuan hartuko duzue:
  - ostatua
  - eguraldia
  - garraiobidea
- ✓ Zuk ondorengo proposamenak egingo dizkiozu:



EDO



- ✓ Saiatu ados jartzen.